

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Incuintri online al prin di Lui a lis 7 di sere par scuvierzi i leams cul Teritori

O cognossin il Patriarcjât di Aquilee tant che une istituzion gleseastiche che par vie di cierts avigniments e kundizions storichis e je rivade a vè une funzion politiche e amministrative in ete medievâl. Se e je vere che la sede dal vescul di Aquilee e je stade una da lis primis a nassi sul principi da la Storie de Glesie e e à dât un contribût fundamentâl a la evangjelizazion no dome dal Nord Est d'Italie ma di dutis lis regions da l'Europe centrâl, lis competencis amministrativis dal Patriarcje a son vignudis inte ete di mieç: cul diplome dai 3 di Avrîl 1077, di fat, l'imperadôr Indrî IV, tornant indaûr di Canossa, al ricognossè al patriarcje di Aquilee ciertis prerogativis ducâls su diversis proprietâts in Friûl e tes regions dongje. Cheste kundizion di autonomie politiche e je durade fin al 1420, cuant che la plui part dal Friûl e va a finîle sot dal domini di tieferme da la Republiche di Vignesie. Par plui di trê seculi, duncje, il Patriarcje al à vût podès temporâi: in tancj a viodin in cheste kundizion il principi da la autonomie furlane e regionâl. Come che o savin, il Patriarcjât di Aquilee al è restât sù in cualitât di ent gleseastic fin al 1751, cuant che pape Benedet XIV al istituìs lis dôs Arcidiocesis di Gurize e di Udin: a Gurize i vegnin assegnâts i teritoris



Patriarcjât di Aquilee: storie, fede e ereditât

Iniziative di "Leali delle Notizie" e da la Filologjiche, cun interventis di pre Renzo Boscarol, Ivan Portelli, Pier Carlo Begotti e Desirée Dros

imperîai, a Udin chei dependents da la Serenissime. Par discuti di chest teme, ancjemò pôc cognossût ma une vore interessant par vie dai riflès ch'al à su la atualitât, la Associazion "Leali delle notizie" e la Societât Filologjiche Furlane a metin adun un apontament sul web, a conclusion da la schirie di incuintris online di "Aspettando il Festival...", in riferiment al festival dal gjornalism che

di cualchi an incà e immanee la Associazion "Leali delle notizie". Chesj incuintris a jerin in program pal mès di Mai in diviers comuns dal Gurizan, ma par vie da la situazion epidemiologjiche atuâl a son stâts trasferîts sul web, cuntun bon sucès. Cuale ocasion miôr, duncje, par scuvierzi i leams jenfri l'antîc Patriarcjât di Aquilee e il nestri teritori? O podarin scuvierzilu miercus al prin di Lui a lis 7

sotsere, cuant che sul canâl YouTube di Leali delle Notizie al vignarà trasmetût l'incuintri online "Il Patriarcato di Aquileia e il Territorio: storia, fede, eredità". Il teme dal incuintri al sarà propit il Patriarcjât e la discussion su cemût che la sò presince sul nestri teritori e à influençât ancje la nestre identitât culturâl. Un "panel" che al intint fermâ la atenzion simpri sul teritori, cjapant in considerazion in chest câs i aspjets storics, sociâi e economics leâts a la presince dal Patriarcjât. Si fasarà une analisi dal Patriarcjât e da la sò ereditât ancje dal pont di viste religjôs. I ospits dal incuintri online a saran pre Renzo Boscarol, plevan di San Stiefin e di San Lurinc a Roncjis, Ivan Portelli, storic e archivist president dal Istitût di Storie Sociâl e Religjose di Gurize, Pier Carlo Begotti, storic da la Filologjiche Furlane che al fasarà cualchi aprofondiment di caratar storic, Desirée Dros da la Societât furlane di Archeologie che e fevelarà invezit dal Patriarcjât dal pont di viste artistic. Introduzion e moderazion dal incuintri a saran par cure di Feliciano Medeot, diretôr da la Filologjiche. Il link dal event si pues cjatâlu ancje sui canâi "social" e sui sîts internet da la Associazion "Leali delle Notizie" e da la Societât Filologjiche Furlane, in maniere di permeti a ducj i interessâts di podè colegâsi in maniere facile.



E je rivade une gnove racuelte a insiorâ il font da lis cartulinis storichis da la Filologjiche Furlane: il soci Giacomo Vittorio Busilacchio di Cormons al à donât a la nestre Societât, e noaltris lu ringraciâm di cûr, 44 cartulinis che nus mostrin tancj bieî cjantons di Cormons za da la fin dal Votcent. Tantis a son cartulinis viazadis, cualchidune ancje cul bol de Austrie. Nus mostrin la evoluzion da la citadine vie pal tal timp e cemût che ancje la

toponomastiche e je cambiade daûr dai avigniments storics: par fâ cualchi esempli o vin "Viale della Stazione" (cumò Viale Friuli), "Via Maggiore" (Via Matteotti) o "Piazza Cumana", po clamade "Piazza Vittorio Emanuele III" e che in di di vuè e je "Piazza Libertà". Cundiului a son cetancj panoramis di Cormons, la Subide, il domo, il santuari di "Rosa Mistica", municipi e teatri, la stazion, il palaç de Casse di Sparagn, il palaç Waiz-Del Mestri. O viodin ancje il confin jenfri Austrie e Italie, che al lave daûr dal Judri e al passave duncje jenfri Breçan e Visinâl. Lis vecjis cartulinis a diventin cussì une maniere par cognossi la storie dal Friûl a traviars da lis imagjinis che nus mostrin i nestris pais cemût che a jerin. Tai prins agns dopo da la fondazion (1919) e fin tai agns Trente, la Filologjiche e domandave ai siei socis, a mieç dal boletin "Ce fastu?", di puartâ dongje cartulinis dal Friûl e man a man si è formât il font: 1.589 cartulinis di 84 localitâts. Tai ultins agns lu vin catalogât e

digjitalizât par intîr, otignint cussì un risultât dopli: la protezion dal materiâl originâl, in grazie da la riproduzion digjital a altissime definizion da lis imagjinis, e la pussibilitât di valèsi dal font metint in rê ogni singule fotografie: si che duncje il font al è in linie sul sît da la Filologjiche e si pues consultâlu in maniere libare (il link al è www.filologicafriulana.it/biblioteca-e-archivi/fondo-cartoline/), fasint diferents gjenars di ricercje, par esempli par localitât. Ma o varessin gust che cheste biele donazion e fos dome la prime di tantis altris, par fâ inressi ancjemò di plui chest preseôs tesaur. Allora vuè, come une volte, la Filologjiche e torne a domandâ ai Furlans di puartânus lis cartulinis dal Friûl che a àn a cjase, salacor dismenteadis dentry di cualchi scansel: al baste clamâ la Biblioteche (tel. 0432 501598 int. 2, biblioteca@filologicafriulana.it) o la sede di Guriza (tel. 0481 533849, gorizia@filologicafriulana.it).

Une gnove racuelte e insiore il font storic da la Filologjiche Furlane Cormons in cartuline